

Morning Dogri (NSD)

26-10-2025

खबरां

1. प्रधानमंत्री नरेन्द्र मोदी होर अज्ज दिनै 11 बजे आकाशवाणी पर अपने मन की बात कार्यक्रम दे राहें देश-बदेश दे लोकें कन्नै बचार सांझे करडन।
2. प्रधानमंत्री मोदी अज्ज 22में आसियान-भारत शिखर सम्मेलन गी वर्चुअल ढंग्गै कन्नै संबोधित करडन।
3. चक्रवाती तूफान मोन्था आंध्र प्रदेश दे समुंदरी कंडूे कन्नै टकराग। एह्दे मद्देनज़र आंध्र प्रदेश ते ओडिशा च भारी बरखा दी चेतावनी जारी कीती गई ऐ।
4. अज्ज छठ महापर्व दा दुआ दिन ऐ। इसी खरना दे नांऽ कन्नै जानेआ जंदा ऐ। अज्जै दे दिन श्रद्धालु सूर्योदय थमां सूर्यास्त तगर निर्जल बरत रक्खदे न।
5. भारत दी हंसिका लांबा ते सारिका मलिक ने सर्बिया च आयाजित 23एं ब'रें शा हेठली उम्मी दे खड्डारिएं दी विश्व कुश्ती चैंपियनशिप च चांदी दे तगमे जित्ते न।

<><><><><><>

PM-MKB

प्रधानमंत्री नरेन्द्र मोदी अज्ज दिनै 11 बजे आकाशवाणी पर मन की बात कार्यक्रम दे राहें देश-बदेश दे लोकें कननै अपने बचार सांझे करडन। एहू इस माह्वार रेडियो कार्यक्रम दी 127मीं किशत होग। एहू कार्यक्रम आकाशवाणी ते दूरदर्शन दे समूलचे नेटवर्क, आकाशवाणी समाचार वेबसाइट ते न्यूज़ऑनएयर मोबाइल ऐप पर प्रसारत कीता जाहग। एह्दा सिद्धा प्रसारण आकाशवाणी समाचार, डीडी न्यूज़, प्रधानमंत्री हुं'दे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ हिंदी प्रसारण दे तुरत मगरा एह्दा डोगरी भाशा च अनुवाद बी प्रसारत कीता जाहग। डोगरी भाशा च एह्दे अनुवाद दा प्रसारण रातीं 8 बजे इक बारी परतियै बी होग। तोआई आकाशवाणी जम्मू दे क्षेत्रीय समाचार एकांश आसेआ मन की बात पर इक रातीं साड्डे 10 बजे इक बशेश परिचर्चा प्रसारत कीती जाहग जेह्दे च साड्डे परौहने होडन मन्ने-परमन्ने दे समाजी कार्यकर्ता ते

साईकॉलोजिस्ट डाक्टर रोमेश शर्मा। इंदे कन्नै गल्लबात करडन साढे न्यूज़ एंकर विजय बजाज।

<><><><><><>

PM-ASEAN

प्रधानमंत्री नरेंद्र मोदी अज्ज 22में आसियान भारत शिखर सम्मेलन च वर्चुअल ढंगे कन्नै हिस्सा लैडन। विदेश मंत्रालय नै इक बयान च आखेआ ऐ जे प्रधानमंत्री मोदी ते आसियान नेता सांझे तौरा पर आसियान भारत सरबंधें च प्रगति दी समीक्षा करडन ते रणनीतिक सांझेदारी गी मजबूत करने दी पैहलें पर चर्चा करडन। मंत्रालय नै आखेआ जे आसियान दे कन्नै सरबंधें गी मजबूत करना भारत दी एक्ट ईस्ट नीति ते हिंद प्रशांत दृष्टिकोण दा इक प्रमुख स्तम्भ ऐ। विदेश मंत्री डॉ. सुब्रह्मण्यम जयशंकर 27 अक्तूबर गी कुआलालंपुर च 20में पूर्वी एशिया शिखर सम्मेलन, हिंद प्रशांत क्षेत्र च शांति, स्थिरता ते समृद्धि आस्तै चुनौतिएं पर विचार-विमर्श करने ते क्षेत्रीय ते अंतरराष्ट्री विकास पर विचारें दा आदान-प्रदान करने दा अवसर प्रदान करडन।

<><><><><><>

Depression Bay of Bengal

बंगाल दी खाड़ी दे उप्पर बने दा दबाऽ चक्रवात च तब्दील होई सकदा ऐ। मौसम विभाग दे मताबक चक्रवात 'मोन्था' मंगलवार शामी जां रातीं लै आंध्र प्रदेश दे तटीय इलाके काकीनाडा दे कश भीषण चक्रवाती तूफान दे रूपै च दस्तक देगा। एह्दे कन्नै आंध्र प्रदेश, ओडिशा ते पच्छिम बंगाल च मौलेधार बरखा होने दी मेद ऐ। चेन्नई ते तमिलनाडू दे उत्तरी इलाकें च एह्दा ज्यादा असर नेई पौने दी मेद ऐ।

<><><><><><>

Delhi-Airport Terminal

शैह्नी हवाबाजी मैह्कमे दे केंद्री मंत्री राम मोहन नायडु होरें कल दिल्ली दे इंदिरा गांधी अंतर्राष्ट्री ब्हाई अड्डे दे 2 नम्बर टर्मिनल दा औपचारिक उद्घाटन कीता। एह् टर्मिनल-टू यात्री सेवाएं लेई अज्ज थमां फ्ही शुरू करी दिती जाह्गा। एह् टर्मिनल 5एं म्हीनें दे वकफे परैन्त खोलेआ जा'रदा ऐ। श्री नायडु होरें आखेआ जे शैह्नी हवाबाजी दा खेत्तर लगातार विकसित होआ करदा ऐ ते उं'दा मंत्रालय ब्हाई यात्रा गी सुगम बनाने लेई लगातार जतन करा'रदा ऐ।

<><><><><><>

Vaishnav Mobile Manufacturing

इलेक्ट्रानिक्स ते सूचना प्रौद्योगिकी मंत्री अश्विनी वैशणव होरें आखेआ ऐ जे भारत मोबाइल निर्माण उद्योग च आत्मनिर्भर बनने बक्खी अग्रसर ऐ। उनें आखेआ जे 2 बरें दे अंदर देश च मोबाइल फोन दे पुर्जे दा पूरा-पराता घरेलू उत्पादन शुरू होई जाग। कल नमीं दिल्ली च संवाददाताएं कन्नै गल्ल करदे होई वैशणव होरें आखेआ जे देश च सी.सी.टी.वी सने बक्ख-बक्ख तकनीकें आस्तै चिपसेट विकसित कीते जा'रदे ना। उनें आखेआ जे सरकार सर्वर सने उच्च प्रदर्शन कम्प्यूटिंग आस्तै उर्जा कुशल माइक्रो प्रोसेसर विकसित करने लेई 200 करोड़ रपे शा मते दा निवेश करोग। उनें एहू बी दस्सेआ जे हुनै तगर 12 लक्ख शा मते केंद्र सरकार दे कर्मचारी जोहो दे स्वदेशी डिजिटल सूट कन्नै जुडी चुके दे ना।

<><><><><><>

Chhath

अज्ज छठ महापर्व दा दुआ दिन ऐ। इसी खरना दे नांऽ कन्नै जानेआ जंदा ऐ। अज्जै दे दिन श्रद्धालु सूर्योदय थमां सूर्यास्त तगर निर्जला बरत रक्खदे ना। सूर्यास्त दे बेल्ले भगवान सूर्य नारायण गी अर्घ देने परैन्त गै बरत खोलेआ जंदा ऐ। च'उं दिनें दी छठ पूजा कल नहाय-खाय दे कन्ने शुरू होई ही। सूर्य देव ते उं'दी बहन छठी मैया दी पूजा गी समर्पित एहू पर्व पवित्रता, कृतज्ञता ते कल्याण दी भावना दा प्रतीक ऐ। प्रधानमंत्री नरेन्द्र मोदी होरें छठ पर्व दे मौके उप्पर श्रद्धालुएं गी शुभकामनां दित्तिआं ना। इक सोशल मीडिया पोस्ट च, श्री मोदी होरें बरत रक्खा करदे सबनें लोकें दी अननुदृ भक्ति गी नमन कीता। इस मौके उप्पर, प्रधानमंत्री होरें छठी मैया गी समर्पित इक भक्ति गीत बी सांझा कीता। प्रधानमंत्री होरें कामना कीती जे छठी मैया सबनें पर अपनी असीम कृपा बनाई रक्खन।

<><><><><><>

Shivraj Krishi Yojana

केंद्री कृषि ते करसान कल्याण मंत्री शिवराज सिंह चौहान होरें आखेआ ऐ जे प्रधानमंत्री धन धान्य कृषि योजना दे तैहत रामनाथपुरम, शिवगंगा, थूथुकुडी ते विरुधुनगर जिले शामिल ना। वेल्लोर च करसाने कन्नै गल्लबात च उ'नें आखेआ जे इस परियोजना दे तैहत करसाने गी व्यापक लाहू पुजाने लेई 36 योजनाएं गी एकीकृत कीता जा'रदा ऐ। उ'नें चार सहभागी कृषि विज्ञान केंद्रें दे प्रमुखें कन्नै योजना दी प्रगति दी समीक्षा कीती। श्री चौहान होरें कुदरती कृषि पद्धतियें ते राष्ट्री दलहन मिशन पर ज़ोर दित्ता। इस अभियान च देशै गी दालीं दे उत्पादन च आत्मनिर्भर बनाने दे प्रधानमंत्री नरेन्द्र मोदी हुं'दे नजरिये दे महत्व गी

उजागर कीता गेआ ऐ। उ'नें दस्सेआ जे तमिलनाडु ज्नेह राज्यें गी उन्नत किस्में, उन्नत तकनीकें ते बेह्तरीन मार्किटिंग दे माध्यम कन्नै इस मिशन राहें बड़ा लाहू होग। श्री चौहान होरें तमिलनाडु कृशि विश्वविद्यालय दे तैहत राश्ट्री दलहन केंद्र, वम्बन आसेआ विकसित उन्नत दलहन किस्में दी बी सराहना कीती। उ'नें तमिलनाडु दे करसानें दी सख्त मेहनत दी सराहना कीती ते आखेआ जे ओहू उं'दी संस्कृति ते मुल्लें दा सम्मान करदे न।



Accession Day JK

अज्ज 26 अक्तूबर दे ध्याड़े गी जम्मू-कश्मीर दे विलय दिवस दे रूप च मनाया जा'रदा ऐ। अज्जै दे ध्याड़े सन् 1947 च जम्मू-कश्मीर दे महाराजा हरी सिंह होरें विलय पत्र पर दस्तखत करियै समूलचे जम्मू-कश्मीर गी भारत दा अनत्रुट्ट हिस्सा बनाई दित्ता हा। महाराजा हरी सिंह हुं'दा एहू ऐतिहासिक फैसला बड़े महत्वपूर्ण मौका पर आया हा कीजे उस बेल्ले पाकिस्तानी घसपैठिएं जम्मू-कश्मीर पर हमला करी दित्ते दा हा ते पाकिस्तान जबरन इसी अपने कन्नै रलाना चांहदा हा। पर विलय पत्र पर दख्त दे मगरा भारती फौजां इत्थे पुजियां ते उ'नें पाकिस्तानी घुसपैठिएं गी इत्थुआं खदेडी दित्ता। अज्जै दे इस ऐतिहासिक ध्याड़े गी समूलचे जम्मू-कश्मीर च बड़े गर्व कन्नै मनाया जा'रदा ऐ। अज्जै दे ध्याड़े केई समारोह बी आयोजित कीते जा करदे न।



World Wrestling Championship

भारत दी हंसिका लांबा ते सारिका मलिक नै सर्बिया च आयोजित 23 ब'रें कोला घट्ट उम्मी आहली विश्व कुशती चैंपियनशिप च चांदी दा तगमा जित्तेआ ऐ। प्रतियोगिता च भारत नै महिला वर्ग च 7 पदक जित्ते। हंसिका ते सारिका दे अलावा नीशू, नेहा शर्मा, पुल्लिकत, सृष्टि ते प्रिया मलिक नै बी कैऽ दा तगमा अपने नांऽ कीता। पुरूषें दे फ्रीस्टाइल स्पर्धा च परविंद्र गी कैऽ दे तगमे ते प्लेऑफ मुकाबले च जपान दे योशिनोसुके आओयागी कशा हार दा सामना करना पेआ। 65 किलोग्राम भार वचर्ग च सुजीत कलकल सुन्ने दे तगमे आस्तै भारत दी सभनें शा बड्डी मेद बने दे न।



Cricket

सिडनी च भारत नै त्रीये ते अखीरले इक रोजा क्रिकेट मुकाबले च आस्ट्रेलिया गी 9 विकेटें कन्नै हराया। रोहित शर्मा होरें'गी आउट होए बगैर 121 रन्ज दी शतकीय पारी आस्ते प्लेयर ऑफ दा मैच चुनेआ गेआ। श्रृंखला च शानदार प्रदर्शन आस्तै उ'नेंगी प्लेयर ऑफ दा सीरीज बी चुनेआ गेआ। एह्दे शा पैहले आस्ट्रेलिया नै टॉस जित्तिये पैहले बल्लेबाजी करदे होई भारत गी 237 रन्जें दा लक्ष्य दित्ता हा। हालांकि, आस्ट्रेलिया नै त्रै मैचें दी श्रृंखला 2-1 कन्नै जित्ती लैती ही। भारत हुन आस्ट्रेलिया कन्नै 5 मैचें दी टी-20 श्रृंखला 29 अक्तूबर कन्नै खेड्ढोग।

